

Ontmoeting 3

Elia en die Baälprofete

Kinders leer dat daar net een ware God is en niks anders mag vir ons belangriker as Hy wees nie

Teks: 1 Konings 18:16–46

Hulpmiddels:

- 24 kerse
- 2 houers om kerse regop in te laat staan
- Vuurhoutjies
- Elia-video (beskikbaar by: https://youtu.be/qmZnryPUC3Y?list=PLktIXDwXKqcZX-cW3hOZN3tI_NT-4BViA)
- Klei of klippe
- Afdrucke van die “Elia en die Baälprofete aktiwiteit”



Welkom

Sny 24 kerse middeldeur en laat hulle staan in 2 groot houers of op planke met spykers. Sit die kerse stewig vas. Roep een van die ouer kinders vorentoe en laat hy h teenstaander kies. Hulle gaan kyk wie kan die meeste kerse met een vuurhoutjie aansteek. Die res van die groep word in 2 gedeel om die twee wat meeding, aan te moedig. Om dit regverdig te maak, maak seker dat jy al die kerse voor die ontmoeting aansteek en seker is dat hulle sal brand.



Wyding

Laat die kinders hul oë toemaak. Laat hulle kyk na die donker en lig patrone binne hul ooglede. Sê na 10 tellings in h rustige stem (terwyl hul oë toebly): “God se lig skyn altyd oor jou, of dit donker of lig in jou lewe is. Vra God om die donker dinge in jou lewe vir jou te wys en jou te help om dit weg te neem.” Wag nog h paar tellings en sê dan: “Amen.”



Woord

Verlede keer het ons geëindig by die droogte wat nog oor die land geheers het. Na ongeveer 3 jaar het Elia opdrag van God gekry dat hy moes teruggaan Israel toe en met Agab gaan praat. Op pad paleis toe het hy vir Obadja, die paleisopsigter, in die veld gekry. Koning Agab en Obadja was juis weer op soek na Elia. Elia het hom gevra om vir Koning Agab te gaan roep. Hy wou dieselfde dag nog met hom praat. Obadja was baie bang, want Koning Agab het nou al 3 jaar lank oral na Elia gesoek. Sê nou net Elia is weer weg as hy met die koning terugkom? Maar Elia het belowe dat hy net daar sal wag.

Koning Agab was baie kwaad vir Elia, want hy het gesê dis Elia se skuld dat dit so sleg gaan met die land. Elia het aan die koning verduidelik dat dit nie sy skuld was nie, maar die koning en sy mense s’ n. Agab en sy mense hou aan om dinge te doen wat die Here nie wil hê nie. Elia is net God se boodskapper.

Elia het vir Agab gesê: “Laat weet al die Israëliete dat ek hulle by die Karmelberg wil sien. Die klomp mense wat vir die god Baäl werk en hom aanbid én die wat vir die godin Asjera werk en haar aanbid, moet ook daar wees.”

Agab het toe h boodskapper gestuur om almal bymekaar te laat kom.

Ek wonder wat gaan nou daar op die berg gebeur...

Onthou julle dat julle verlede keer h uitnodiging na vandag se byeenkoms gekry het? Julle gaan nou “Volg die Leier!” speel. *(Die leier kan hulle deur die vertrek lei, oor hindernisse en waar moontlik laat trappe klim. Laat hulle hul verbeeld hulle klim teen die berg Karmel op. Maak denkbeeldige klimbewegings en vee kort-kort die sweet van julle voorkoppe af.)*

Die kinders kan na die vertrek gelei word waar hulle die video van Elia gaan kyk of hulle kan in die vertrek rondgelei word na die plek waar hulle na die video gaan kyk. *(As die aanbieder nie die video wil speel nie, kan die verhaal met dramatiese handgebare en stemtoonveranderinge vertel word.)*

Speel die video: https://youtu.be/qmZnryPUC3Y?list=PLktiXDwXKqcZX-cW3hOZN3tI_NT-4BViA

Wanneer die video klaar is, sluit die aanbieder die storie af met die laaste paragraaf van die vertelling hier onder: (“Toe het Elia vir Agab gesê...”)

Hier is die storie as jy dit gaan vertel:

God teen Baäl – die vertelling

Elia het vir die mense gevra: “Hoe lank gaan julle nog vat om te besluit wie regtig God is? Vandag moet julle kies tussen God en Baäl. Ek is nog die enigste een hier wat vir die Here werk. Daar anderkant staan die mense wat vir die afgode werk. Ons sal vandag sien wie die ware God is.

Ons kompetisie gaan nou so werk:

Bring vir ons twee bulle. Die priesters van die afgode kan h bul kies en hom slag en opsny. Dan moet hulle die vleis op die plek sit waar hulle vir hulle god wil offer. Maar hulle mag nie die hout aan die brand steek nie. Hulle moet hulle gode vra om hulle vuur aan die brand te steek. Ek sal ook ’n altaar voorberei en ek sal die Here vra om myne aan die brand te steek. As een van die vure begin brand, sal ons weet wie regtig God is.”

Die baälprofete het eerste kans gekry om die vleis reg te kry en toe het hulle begin bid: “O Baäl, steek asseblief die vuur aan!” Maar niks het gebeur nie. Hulle het die hele oggend lank gebid en gedans, maar dit het nie gehelp nie. Teen twaalfuur die middag het Elia hulle begin spot: “Julle moet harder roep! Dalk is julle god met ander dinge besig en kan hy julle nie hoor nie!” Die hele middag lank het hulle geskreeu. Hulle het hulle selfs stukkend gesny sodat dit gebloei het. Alles was bedoel om Baäl en Asjera se aandag te trek, maar niks het gebeur nie.

Toe het Elia al die mense nader geroep. Hy het 12 klippe gevat en h nuwe altaar (vuurmaakplek) gebou. Daarna het hy h sloot rondom gegrawe. Eers het hy die hout bo-op die klipstapel reggesit en toe het hy die bul in stukke gesny en die vleis op die hout gesit. Maar dis nie al nie. Hy het gevra dat hulle nog twaalf emmers vol water oor die hout en vleis moes gooi. Dit het hulle 3 keer gedoen. Dit was só nat dat die water tot in die sloot rondom die klippe geloop het. Almal was seker dat hierdie hoop nooit gaan brand as dit so nat is nie.

Teen die aand het Elia gebid: “O Here, U is Abraham, Isak en Jakob se God. Wys asseblief vandag vir almal dat U die enigste God is! Wys ook vir hulle dat ek vir U werk en dat ek net doen wat U vir my sê. As U antwoord, sal al die mense weet dat U regtig die Here God is. Hulle sal weer in U glo.”

Daar kom toe vuur van die Here af en verbrand alles. Nie net die vleis en die hout nie, maar ook die klippe en die grond het verbrand. Die water in die sloot rondom die klippe is ook deur die vuur opgelek. Alles!

Toe die mense sien wat gebeur het, het hulle op hulle knieë geval en gesê: “Die Here is regtig God!!”

Elia het al die mense wat vir die afgode gewerk het, laat doodmaak, omdat hulle die Israëliete verkeerde dinge geleer het. Hy het geweet dat daar net een ware God is en dat niks of niemand anders vir ons belangriker as God moet wees nie.

Elia het vir Agab gesê: “Eet en drink gou iets, want hier kom groot reën aan.” Gou daarna was die lug vol donker wolke, die wind het begin waai en dit het begin reën. Die droogte wat so lank aangehou het, was uiteindelik verby!

Kinders kry tyd om oor die verhaal te dink:

1. Ek wonder wat jy doen as jy uitgedaag (ge-“dare”) word om iets te doen.
2. Ek wonder watter goed in ons lewens is soms vir ons belangriker as God.
3. Ek wonder of die Israëliete nou uiteindelik geleer het en sal onthou dat daar net een God is.
4. Ek wonder wat ons moet doen wanneer iemand God se naam vloek of vir God slegsê.



Werskaf

- Gee vir die kinders klei of klippe om hul eie altare te bou en die verhaal uit te speel.
- Voltooi Elia en die Baälprofete aktiwiteit– omkring die regte antwoord.

Gebed: Laat die kinders dinge opnoem wat vir ons soms belangriker is as God – byvoorbeeld die verskonings hoekom ons nie Sondag kerk toe kon gaan nie. (Ek moet leer vir môre se toets; ek het gisteraand te laat televisie gekyk; ek neem deel aan 'n sportwedstryd, ens.) Is dié goed dan vir ons belangriker as God?

Ons gaan nou ons oë toemaak en vir God sê dat ons jammer is dat daar so baie dinge is wat so maklik vir ons belangriker word as Hy.

Of

Gee 'n paar oomblikke van stilte en sluit af met die woorde: “Here, help my asseblief wanneer ander mense lelik is met my, my boelie of my spot dat ek nie moedeloos word nie. Ek weet dat ek baie spesiaal is vir U. Ek bid ook vir die mense wat boelies is of ander spot, dat U hulle sal help om te verstaan hoe verkeerd dit is en dat hulle daarmee sal ophou. Help my dat ek ook nooit ander sal boelie of spot nie.”

Elia en die Baäl profete:

Omkring die letter onder die woord “WAAR” indien die sin waar is of die letter onder die woord “VALS” indien die sin vals is.

- | | | | |
|-------|------|--|--|
| WAAR | VALS | | |
| 1. G | C | Obadja het gras gesoek vir die diere se voer | |
| | | (1 Konings 18: 5) | |
| 2. P | E | Obadja wou Elia seermaak. | |
| | | (1 Konings 18: 7) | |
| 3. N | F | Elia het die Baäl profete uitgedaag om hom te ontmoet op berg Karmel (1 Konings 18: 19) | |
| 4. B | A | Die wedstryd was om te sien wie die gouste 'n vuur kon aansteek. (1 Konings 18:24) | |
| 5. U | N | Elia het gesê dat die God wie antwoord met reën, is die ware God. (1 Konings 18:24) | |
| 6. D | R | Die profete van Baäl het heeldag gebid, maar niks het gebeur nie. (1 Konings 18:29) | |
| 7. P | E | Elia het 'n altaar van hout gebou. (1 Konings 18: 31 - 32) | |
| 8. A | G | Elia het vir die diensknegte gesê hulle moet olie op die altaar gooi. (1 Konings 18: 33 - 34) | |
| 9. O | C | God het geantwoord deur vuur te stuur. (1 Konings 18:38) | |
| 10. D | E | Die mense het uitgeroep: "Die Here is God." (1 Konings 18:39) | |



Vul nou die letters hieronder in wat uitgelaat is, deur die omringde letters te gebruik.

	E		
--	---	--	--

				R	
--	--	--	--	---	--

--	--	--